

**Naul nga  
JEMES  
Muli  
Batu nale nga mivsivseni lut  
nga parmeteni naul ngel  
puto suri**

Rrek Jemes nga muli naul ngel evi Jemes nga tasi Iesu, nga mivi m̄erwomu se kalesia nir Jerusalem (Majingen se Aposol nir 15:13, 21:18). Jemes oli naul ngel vanji kalesia p̄etpeti nir nga marlik sarrsarr renge vanu nir nga batu numal se m̄eri Rom mutorir. Ko owra suri lat nga parluk puto suri.

Jemes owra, poro rraposuri, ko rraploli ko wor nanu sopor suri, sete rrapmatur tevi. Ko ospē nanu elep nga m̄ilesi m̄irres nga rraplolir. Ko owra, poro jorom ejkie, sete nolom pivitan. Sete kuplolar pingavil. Kuprres tevi jinibb nir. Kupmetmete nemem. Kupmarong nga kuploli sev nga Atua mimrreni, ko kuptur tere Demij. Sete kuprij melmelas suri sev nga kuwra kuploli. Poro jorom pilep, ko kupwilwil se nir nga joror mijkie. Nolom pipriv, nolom p̄irres.

*Nale womujnen*

<sup>1</sup> Inu Jemes, nuvi jinibb ne majingen se Atua ko se Iesu Kristo Numal se kerr. Nuwrai erres

tevi kami, metka esngavöl drromon eru (12) ne méri Isrel, nga kamlik sisamis iel ngatan.

### *Nosurien ko norongwosien*

<sup>2</sup> Tasik ko jojik nir, daron nga nanu lele parini parrowrrowe kami, sete kaplai pirpe nanu nga kaprunge ſisij suri. Ejki, kapir temijpal ko wor suri. <sup>3</sup> Erpe kami kamrongwos pae, daron nga nosurien se kami mīterter renge nanu nir nga marrowrrowe kami, kamrongwose kapterter kele wor nga kaptur pipriv. <sup>4</sup> Kaptur pīterter ko wor tetajer. Ko ngok puloli kapi-ivi jinibb nga marmomsawos jile mīrres, ko nororrmien tera puto vajin pīrres re mauren se kami, ko murrun jijle nga marres arto pa re mauren se kami.

<sup>5</sup> Ko poro norongwosien pijki ji kami san, ni pungoni ko wor tevi Atua; ko Atua ſilai norongwosien tevi ni, suri nolo Atua nga mīrres ſelak oklai nawone wor nanu tevi jinibb totoklai, nga sete nolon ſisij kele suri. <sup>6</sup> Ko daron nga kamngoni e, nosurien se kami pivi weretunen ko wor, sete piwelili. Suri jinibb nga nororrmien sen miwelili erpe dis kobbong; suri daron nga ling muwuwi, ko owlu karkar. <sup>7-8</sup> Jinibb si nga nolon mieru e mirpok, nororrmien sen owluwlu, ko sete erres ni purrorrmi nga ni orongwose ſilai nanu san ji Atua, ejki.

### *Jinibb nga joror milep ko jinibb nga joror miwelili*

<sup>9</sup> Kalesia si nga joron miwelili sete purnge ſisij suri. Ejki, pīr ko wor, suri Atua osusture ni.

<sup>10</sup> Ko kalesia nga joron milep sete pukowkowri

suri joron, ejki. Poro Atua ūlengen ni ngatan, ko ni pukowkowri kobbong. Suri jinibb nga joron milep erpe nevngu vava kobbong. <sup>11</sup> Daron nga nial mivini mare nga mututun milep, ūlengen nevngun ngok nir parmeli ko parvitan, ko nulser nga marres ūpelak ngok parjikki. Ko pusorsan kele renge murrun ngok, daron nga jinibb nga joron milep ngok mokpelak nga joron pilep kele wor, ni pia-jikki suri.

### *Nanu nir nga marok-rrowrrowe jinibb*

<sup>12</sup> Jinibb nga mutur mīterter renge daron nga nanu nir marrowrrowe purnge ūlengen ko wor. Suri daron nga mīasie nanu ngok nir, ko Atua pia-lai nowlin tevi vajin, nga mivi mauren nga ūlengen. Ngok evi nowlin nga muwrai pa musuw nga pia-lai tevi nir nga marmerreni ni milep. <sup>13</sup> Poro jinibb san ūlesi nanu san purrowrrowe ni, ko ni sete puwrai pirpel “O, Atua ko orrowrrowe inu.” Ejki, suri nanu nga mīsij sete orongwos purrowrrowe Atua, ko Atua sete orongwos purrowrrowe jinibb san nga puloli nololien nga mīsij. <sup>14</sup> Ko nanu nir arongwos parrowrrowe jinibb daron nga ni sete mivijuri Atua ko mivijuri lweni sev nga ni lweni mimrreni, ko nanu nga marsij markerkerasi ko marevei tweni. <sup>15</sup> Ko norrorrmien nga marsij ngok arvesi nololien, ko nololien, daron nga milep vajin, ko evesi mijen.

<sup>16</sup> Tasik ko jojik nir, numrreni kami elep. Sete kaploli jinibb parkerkerasi kami, ko kaprongwose ūlengen <sup>17</sup> nga nanu jijle nga marres ko merrenien jijle nga marres lenglengen arpelari mare ji Atua ko wor nga ūlengi moron re melrin,

mian ko mara-vini ji kerr. Murru Atua sete orongwos ūirieni, ko sete orongwos ūilik telure kerr ko ūilinglingi kerr renge nemalik. <sup>18</sup> Suri Atua emarong, niko mīlai nale weretunen sen tevi kerr nga rrapivi natun. Ko renge nanu ijile nga mīmajinge ko mīlngi iel ngatan, kerr rramivi batbatun.

### *Kaprunge ko kaploli ko wor nale se Atua*

<sup>19</sup> Tasik ko jojik nir, numrreni kami elep. Kapmurrong ūirres. Kami ijile, lolaren se kami sete pingavilvil ūelak, ko rijen se kami kele sete pingavilvil, ko kapsaro ma pingavilvil nga kapmurrong. <sup>20</sup> Suri murru jinibb nga mulolar sete orongwose puloli murren nga mumomsawos nga Atua mimrreni ūirrmali. <sup>21</sup> Niko, kaplai tweni ko wor murren ijile nga marrokkitkit ko murren nga marsij nga marmaur wor milep re nolo kami, ko kaploli wor norrorrmien se kami pian ngatan. Ko kapmarong nga Atua purwi nale sen re nolo kami, nga puloli kapmaur.

<sup>22</sup> Ko sete kapkerkerasi lweni kami nga kaprunge nawon bbonge nale se Atua ko sete kamloli. Kaploli wor nale nga naul ngok muwrai ko. <sup>23</sup> Jinibb nga mumurronge nale ngok ko sete mokloli nanu nga nale ngok muwrai, osorsan tevi jinibb nga mokmeteni non renge natung, <sup>24</sup> ko daron nga mivel lingi, setemun orongwose nga non erpese. <sup>25</sup> Ko nale nesesreien ngok emawos ijile, ko orongwose puloli jinibb pivel sisarow. Ko mēr nga mokmeteni lilane nale nen, ko mokmurronge mīrres, sete ornge nawone,

ejki, okloli ko wor. Ko morok ko ma, Atua puloli purnge ūirres re sev nga muloli ngok.

<sup>26</sup> Poro jinibb san owrai nga ni okosuri Atua erres, ko sete otor metmet lilane nemen, morok rrek okkerkerasi lweni kobbong, ko murren nga mokosuri Atua rengen evi nanu nawon kobbong.

<sup>27</sup> Murru sel nga rraposuri Atua Tata, nga mīlesi muwokwok mīrres ko musorsan mīrres, erpel: kerr pivivel ko wor ji bipiwarreng nga mariivi melus, ko ji nesevin nga diwen ser marmij lingir, ko piwilwil se nir renge sev nga nevrer mumrrol rer. Ko rrapprrul totkonni mauren se kerr puwokwok, nga murren nga mīsij ne iel ngatan sete pulokloksi.

## 2

### *Sete kapmeteni nir nga joror muwelili parirpe nanu nawon*

<sup>1</sup> Tasik ko jojik nir, kamosuri pa Numal se kerr nga mivi Numal ne nosrōvien. Ko niko sete kaploli murren nga kamtori jinibb nga joror milep nir, ko nga kamok-meteni jinibb nga joror muwelili nir arirpe nanu nawon kobbong. <sup>2</sup> Ko niko, poro jinibb pieru porini loloim re naim loten se kami, tuwen nga mujokjok mīrres ko mīlngi nasum nga mivi gol renge bbös nevren, ko tuwen nga joron marmerrerrerr, ko esij poro norrorrmien se kami pieru e re laru ngok nuru.

<sup>3</sup> Sete erres nga kaposuri mēr nga mujokjok mīrres ngok, ko kaprrorrmi ūisij suri mēr nga joron mīsij ngok. Sete osorsan nga kaplai mērwomu van lat nga mīrres ūelak ngok, ko kapwera “Numal, ngel evi lat nga nik, kupini

kupsakel rengen”, ko tevi mervitu nen, kapwera “Kuptur pa iok ko!”, rreknga “O, ejki, rrek kupini ma kuplik iel ngatan”. <sup>4</sup> Daron nga kamok-loli mirpok, ko kamok-teri wukari vajin kalesia se kami evi meling eru e, ko kamok-wer lokloksi jinibb renge norrorrmien nga setete mumomsawos mīrres.

<sup>5</sup> Tasik ko jojik nir, numrreni kami elep. Kapmurrong pīrres. Jinibb nga joror muwelili renge iel ngatan, Atua otobbtobbue tweni nir nga parimare parwun saut renge nosurien. Ko elai derteren tevi nir ngok nga paran loloim renge batun vanu sen, erpe nga muwrai pa tevi jinibb nga marmerreni ni milep. <sup>6</sup> Ko kami ma kamok-meteni ī̄beres nir nir arirpe nanu nawon kobbong. Weta, ko jinibb si nga marok-lokloksi kami, ko marok-lai kami van re nospēn se numal nir? Ngok sete jinibb nir nga joror muwelili, ko jinibb nga joror milep kobbong. <sup>7</sup> Ko nir kele kobbong marok-rij mīsij tere nais nga mīrres ngok nga Atua muloli kamwajie, nga jinibb nir parveruse kami ‘Jinibb se Kristo’.

<sup>8</sup> Renge Naul On, nale nesesreien san oto nga mivi batu nale nesesreien mīnij kele se Atua, nga muwra ‘Kupmerreni ko wor selem nir, kuploli pīrres ko wor tevir pirpe nik komok-loli lweni mīrres tevi nik.’ Poro kapok-vijuri nale nesesreien ngok, ko kamok-vijuri sel nga musorsan ko. <sup>9</sup> Ko poro kapok-osuri jinibb nga joror milep ko kapok-meteni jinibb nir nga joror muwelili parirpe nanu nawon kobbong, ko ngok kami kamok-loli nololien ko, ko nale nesesreien se Atua puwrai nga kamivi jinibb nga kamok-

tor otvi nale nesesreien. <sup>10</sup> Suri jinibb nga putor otvi nale sansan kobbong re nale nesesreien ngok ololi nololien, osorsan erpe nga poro putor otvi nale totoklai ren. <sup>11</sup> Suri Atua nga muwra ‘Sete kapvenae nesevin’, Atua nen kele kobbong muwra ‘Sete kaprevji pini jinibb’. Poro sete kapvenae nesevin ko kaprevji pini ma jinibb, kamivi ko wor jinibb nga kamtor otvi nale nesesreien. <sup>12</sup> Renge nabong nga Atua pia-wer sesesre lat nga puto suri tevi jinibb nir, ko ni puloli kami kapa-asi kobbong. Ko niko lelingenok kami kaploli murru kami ūirres ūetpeti. <sup>13</sup> Suri daron nga Atua pia-wer sesesre lat nga puto suri tevi mēr nga sete mokrrorrmi jinibb, ni kele sete orongwose purrrorrmi mēernen. Ko jinibb nga ma mokrrorrmi jinibb, Atua sete mia-wer lokloksi ni.

### *Nosurien ko majingen*

<sup>14</sup> Tasik ko jojik nir, poro jinibb san pokwera okosuri Kristo, ko sete okloli majingen nga mīrres san suri, ni ūia-lesi sev ko ūirres rengen? Nosurien nga mirpok sete orongwose ūilai ni van re mauren nga mīrres. <sup>15</sup> Poro tasi kerr rrek joji kerr sopor sunsun ko nanen ser pijkie, <sup>16</sup> ko kerr san sete mia-van mia-lai ser, erpese ko? Ko poro kerr san puwrai tevi nir “Atua ūirij ūirres suri kami. Kapluwi van, kaptutun ko kapaan ūirres”, ko sete ūilai sunsun rrek nanen tevir, ko iok sete ewilwil ser rragrarrag. Nale ngok evi nanu nawon kobbong. <sup>17</sup> Ko nosurien se kerr erpok: poro pisan bbong putur, ko majingen nga mīrres san sete putur tevi, ko ngok erpe emij jile ko pa osuw.

**18** Ko poro nik kupwera, “Morok nosurien sen otoe, ko m̄erak ma okloli majingen nga marres”, ko inu bowra lweni tevim, “Eterter wor nga nosurien putoe renge jinibb san poro nga majingen sen ejkie. Suri majingen sen ko wor eviseni nga nosurien sen mutoe.” **19** Nik kuosuri nga Atua esan kobbong otur? Erres, ko demij kele arosuri erpok, ko aririr elep suri! **20** Jinibb nga muosuri ko sete mokloli majingen nga marres, nosurien sen ngok evi nanu nawon kobbong. Jinibb lenglengen, kumrreni beviseni nanu ngok tevim? **21** Erres, ko kuprrorrmi ta b̄irtera ngok se kerr Eram. Atua ololi evi jinibb momsawos renge non suri sev? Suri majingen sen kobbong, nga m̄ilai natun Aesak ko m̄ikai totkoni renge nawot nga pivi sulsulen van ji Atua. **22** Kuplesi, nosurien sen ko majingen sen orto korti erres, ko niko muloli nga nosurien sen m̄irres jijle vajin. **23** Ko nanu ngok ololi nale nga muto renge nale on errmali, nga muwra ‘Eram osuri Atua, ko suri muosuri Atua, Atua ololi ni evi jinibb mawos renge non’. Ko jinibb arok-veruse ni ‘Sele Atua’. **24** Kaplesi ta suri: Atua ololi jinibb evi jinibb mawos renge non suri majingen sen, sete erpe nosurien sen kis kobbong. **25** Ko osorsan kobbong tevi nesevin san ne sel nga tuwi ngok, Reap. Atua ololi evi nesevin nga mimawos renge non suri sev? Suri emetmete m̄eri Isrel ngok nuru erres, nga morini silveni porlesi wose Jeriko. Ko ni etkai nuru oran orteptepi renge naim sen, mian ko vitunen okoni tweni nuru orluwi van sise nuru e renge sel m̄inij, nga m̄eri Jeriko nir sete parrul re nuru.

<sup>26</sup> Niben nga nemin mijki ren sete mia-maur, pimij ko wor. Ko osorsan kele, nosurien nga majingen nga marres sete marpitevi, ni sete mia-maur, pimij kele ko wor.

### 3

#### *Neme kerr*

<sup>1</sup> Tasik ko jojik nir. Sete erres re kami pilep kapivi jinibb nevisvisenien se kalesia nir. Kaprongwose ko wor daron nga Atua piawer sesesre lat nga puto suri tevi kem jinibb nevisvisenien, ni pia-loli piterter kele wor tevi kem, piasi murren nga pia-loli daron nga piawer sesesre lat nga puto suri tevi jinibb minije nir. <sup>2</sup> Daron elep nga kerr jijle rramok-loli esij. Jinibb nga sete mutor jabble nanu san renge nale sen evi jinibb san nga mimawos jile mirres, ko orongwose putor ore nanu nga marsij nga marivi neblaot van re mauren sen totoklai. <sup>3</sup> Rramok-lingi bebje delrrurr nga welili van renge jingo os nga puloli puosuri kerr, ko orongwose rraploli pian lat nga rrammerreni pian e. <sup>4</sup> Ko kaprrorrmi ta drav nga marlelep nga niwos ner marwelili jer kobbong. Ko daron nga ling nga milep milai, jinibb nga mutori niwos ngok orongwose puloli ko wor pian lat nga mimrreni pian e. <sup>5</sup> Ko neme kerr erpok ko. Evi nanu nga welili jer kobbong, ko orongwose pirij melmelas renge nanu nga marlelep nir.

Nabb nga min nga welili jer kobbong evter nga puloli lat nga milep san pinsa. <sup>6</sup> Ko neme kerr osorsan erpok. Evi nibe kerr spon; ko

nanu ijile nga marsij arok-pelari rengen, ko arok-lokloksi totoklai mauren se kerr. Neme kerr elai nabb renge lat ne nejijkien, ko okloli nabb ngok okin surusri renge nolo kerr. <sup>7</sup> Jinibb orongwose puloli nanu rrum nir, numön, numët, ko mesal ne dis parmu, ko arok-loli pa erpok osuw. <sup>8</sup> Ko san sete orongwose puloli ni lweni nemen pumu. Nale nga miplari renge neme kerr esij elep, ko sete rramrongwose rrapjing. Osorsan tevi nanu nga murongwose pirevji pini jinibb. <sup>9</sup> Rramrij ma tevi neme kerr nga rramok-surövi Atua Tata Numal se kerr, ko rramok-rij mísij kele tevi jinibb nir nga Atua muloli nir marsorsan kobbong tevi ni. <sup>10</sup> Renge jingo kerr sansan kobbong rramok-rij nale nga mîrres, ko nale nga mísij kele. Tasik ko jojik nir, setete erres nga nanu ngok piplari pirpok. <sup>11</sup> Sete mete nuwi san orongwose nuwi ko dis, nuru korti porremali rengen. <sup>12</sup> Kami kamrrorrmi nga duru mango orongwose piwen wene namul rengen, rreknga bainau orongwose piwen wene mango rengen? Ejki! Ko dis sete orongwose pivi nuwi nga rramok-mini. Erpok, poro nga jinibb san pokrij ñisij, ngok eviseni pae nga liken sen totoklai esij.

### *Norongwosien nga Atua moklai*

<sup>13</sup> Poro evis re kami ngok marok-wera nga norongwosien ser mutoe ko marongrongwos, erres nga parviseni nanu ngok renge mauren ser. Mauren ser pusorsan ko wor. Nolor pian ngatan, ko majingen ser piplari renge norongwosien ser ngok. <sup>14</sup> Ko poro nolo kami pokleplep ñelak nga jinibb mînij marivi jinibb nga marlelep, daron

nga kami kele bbong kammerreni kapivi jinibb nga marlelep, ngok, sete kaprij melmelas suri norongwosien se kami, ko sete kaploli gerisen nga kapsilveni weretunen. <sup>15</sup> Norongwosien ngok sete evi norongwosien nga miplari renge melrin. Ngok evi norongwosien se jinibb kob-bong, nga miplari iel ngatan, ko miplari ji Demij kele. <sup>16</sup> Daron nga jinibb nolon mokleplep mir-pok ko mimrreni pian mare re jinibb mīnij kele, niko muloli nanu jijle setemun orongwose puko-rti pīrres, ko murrun jijle nga marsij arpelpelari vajin.

<sup>17</sup> Ko murru jinibb nga ma mīlai norongwosien renge melrin enije. Womujnen, mauren sen owokwok erres. Evi jinibb ne demat, evi jinibb nga mīlik malum, evi jinibb nga mukorti mīrres tevi jinibb nir, ko evi jinibb nga mokrrorrmī jinibb. Ko evi jinibb nga weneng nga marres elep arto renge mauren sen. Ko morok sete pokwera jinibb san esij kele, ko sete poksilveni nolon. <sup>18</sup> Ko daron nga jinibb ne demat mar-majing renge murrun nga mumolmol, osorsan tevi maruwi jelangin nga mīrres nga weneng mīvi mauren nga musorsan mīrres.

## 4

### *Murrun nga marsij ne iel ngatan*

<sup>1</sup> Batu balpalen ko batu laten nga marok-pelari ji kami arivel ngabe vini? Arok-pelari suri re nororrmien se kami, kammerreni kaplai nanu jijle, ko ngok ololi nolo kami oto karkar. <sup>2</sup> Nolo kami elai temijpal nanu nir, ko suri

sete kamrongwose kaplair, niko kamrevji pini jinibb surir. Kammermerreni nanu elep, ko sete kamrongwose kaplair; mian ko kamlat, ko kampalpal surir. Ko sete kamlai wor nanu nga kammerreni, suri sete kamngoni tevi Atua. <sup>3</sup> Ko daron nga kamngoni tevi Atua, sete kamlai kele, suri norrorrmien se kami sete osorsan. Kamokngoni nanu ngok nir tevi Atua nga nolo kami kobbong mimrreni.

<sup>4</sup> Kamirpe nesevin san nga mokloli batun. Suri sev sete kamrongwose nanu ngel: jinibb nga mivijuri murru iel ngatan, ko evi pa devje nuval se Atua. Niko, poro jinibb san pimrreni pivijuri murru iel ngatan, ko evi vajin devje nuval se Atua ko. <sup>5</sup> Nale On se Atua owrai erpel: ‘Atua emrreni wor elep nga norrorrmien se kerr nga ni mīlngi muto re nolo kerr ſiterter renge ni kobbong’, ko ngok sete evi nale nawon ko. <sup>6</sup> Ko Atua elai malum wor se kerr, niko Nale On sen muwra ‘Atua ewer ore jinibb nga mulololie, ko oklai se mēr nga nolon mian ngatan’.

<sup>7</sup> Suri nanu ngok, kami kaplingi wor kami ko renge melve nevre Atua. Kami kaptur ore wor Demij ko ſiterter, puloli ni puwlu lingi kami. <sup>8</sup> Kapruj mori Atua, ko ni puruj mori kami. Kamivi jinibb nga kamsij, kapjejavöl vaseni nevre kami ko wor. Kami nga nolon mieru e puloli lweni ko wor nolon pivini pivi sansan e, nga puwokwok luwi. <sup>9</sup> Lelingenok erres re kaprunge ſisij ko wor, ko kapting. Erres re kapting wor suri nololien se kami ko. Rrek erres setemun kapmen ko kaprunge ſirres, ko kaprunge ſisij ko kapting. <sup>10</sup> Kaploli nolo kami

pumolmol womu ne Atua, ko ni pia-loli kapa-tur imare.

*Sete kapwer lokloksi tasi kami nir*

<sup>11</sup> Tasik ko jojik nir, sete kapwer lokloksi lululweni kami. Suri si nga mīwer lokloksi tasin, ewer lokloksi kele nale nesesreien se Atua, ko owra nga nale nesesreien ngok esij. Ko daron nga kamwera nga nale nesesreien ngok esij, setemun kamteptepi rengen; kamtur pa mare renge nale nesesreien ngok osuw. <sup>12</sup> Atua kobbong esan ela nale nesesreien, ko esan kele orongwose ūwer lokloksi jinibb. Derteren sen otoe nga ūila mauren tevi jinibb, rrek puloli jinibb parjijki kele. Ko kami kamrrorrmi kamivi Atua nga kamok-wer lokloksi jinibb nir mirpok?

*Nale nga puwni jinibb nga mokrij melmelas*

<sup>13</sup> Kami sopor arongwose parwerai pirpel, “O, lelingen rreknga mevi kem naban re kele ngaim mīnij e san, ko iok ma nablik e sia totoklai san, nabloli majingen nga nablesi nevöt pilep ren.” Ko kapmurrong ta. <sup>14</sup> Kami sete kamrongwose sev nga ūirrmali renge mauren se kami mevi. Kamirpe bbong numow ko nga ūirrmali ko muto beblen kobbong, ko vitunen mijijki kele. <sup>15</sup> Nale nga mumomsawos nga kapwerai, erpel: “Poro Atua pimrreni nabok-maur, ko kem namrongwose nabloli pirpel, pirpok, ko pirpak.” <sup>16</sup> Ko lelingenok kami kamok-rij melmelas pa mirpok, ololi nororrmien se kami ean mare ūelak. Ko nale melmelas nga mirpok esij. <sup>17</sup> Ko si nga murongwose pa murrun nga musorsan ko sete muloli, erpe ololi pa nololien ko.

## 5

*Nale nga puwni jinibb nga joron milep*

<sup>1</sup> Ko jinibb nga joror milep, kami kele kap-murrong ta inu. Erres kaptинг e daron nga mĩterter nga piplari ji kami. <sup>2</sup> Nijor se kami, erpe armutmut pa osuw. Ko sunsun se kami erpe momom mutir pa musuw. <sup>3</sup> Gol ko silva se kami arerra pa osuw. Ko rrerraen ngok erpe nanu san nga mĩtre kami, ko ūpani nibe kami pirpe nabb. Lelingenok bongsi iel ngatan oto mori, ko kami kamtur imare ko kamok-sere kortoni malum nevöt se kami.

<sup>4</sup> Sete kamteve nowli jinibb nga marmajing renge naut se kami, ko dingen ser ngok ejpari pa nolo boro Atua nga derteren nga milep muto jin. <sup>5</sup> Renge iel ngatan, mauren se kami emalum bbong, ko kamlai pa nanu jijle nga puloli kaprunge ūrres. Kamirpe buluk nga mar-wungani milep mĩrres; ko nabong nga parevji e, kami kampelari pa ren osuw. <sup>6</sup> Kamok-wer lokloksi jinibb nga marmomsawos ko kamrevji pinir. Ko jinibb momsawos ngok nir setete arjingke kami.

*Kami kaploli wor norrorrmien se kami pipriv ko*

<sup>7</sup> Tasik ko jojik nir, kaploli wor norrorrmien se kami pipriv ko, nga kaptiriv pianan pijpari Numal se kerr pia-luwi kele vini. Kaprrorrmi ta murrun ne marloli orsel. Kamrongwose kaploli norrorrmien se kami pipriv kele wor ko kamtiriv mianan mijpari orsel se kami wenan pia-toe. Kami kamtiriv naus nga pusani orsel se kami,

ko kamtiriv kele ko wor nga kapan kaplai nanen rengen. <sup>8</sup> Ko renge murren ngok kele, kami kaploli nororrmien se kami pipriv ko wor nga kaptiriv re nabong nga milep ngok nga Numal se kerr pia-luwi kele. Kaploli wor nororrmien se kami piterter ko, suri sete mia-periv nabong ngok piplari.

<sup>9</sup> Tasik ko jojik nir. Sete erres kapok-worwor suri kami, kapwera “O, nanu nga mīsij ngok, ni ko ololi.” Poro kapok-loli murren ngok, ko Atua putor vitrangi kami. Ko kami kamrongwose nga jinibb nga mok-tor vitrangi jinibb evini pa mori, ko otomori pa pīrrmali.

<sup>10</sup> Tasik ko jojik nir, erres kaprrorrmi propet ne tuwi nir nga marok-werwer renge nise Numal Atua. Jinibb nir arloli arunge esij elep; ko nororrmien ser sete evitan. Ko renge murren ngok, nir arviseni sel nga mīrres pēlak san tevi kerr. <sup>11</sup> Ko suri nir arok-tur eterter tetajer, rramwera Atua ololi nir arunge erres. Ko kami kamrunge pa nale suri murru Jop, nga muloli nororrmien sen mipriv. Ko kami kamrongwos pae nga Numal Atua muloli mīrres tevi vitunen. Suri Numal Atua okloli erres temijpal ko okrrorrmi jinibb nir.

### *Murren ne rijen*

<sup>12</sup> Ko tasik ko jojik nir, mare re nanu jijle nir, daron nga kamloli rijrijen, sete kaplai nais mīnij van re rijrijen se kami nga puloli pīterter kele. Sete kapjuji melrin, rreknga iel ngatan, rreknga nanu mīnij kele. Poro kapwerai “O-o”, ko o-o ko pa, rreknga poro kapwera “Ejki”, ko ejki ko pa.

Ko poro kaprij karkar kele, Atua orongwos putor vitrangi kami ko.

*Loten nga derteren nen mutoe*

<sup>13</sup> Erpese? Kami san ni ko nga norongen nga mīsij miplari jin? Rrek erres ma ni pulot. Jinibb san ni ko re kami nga mokrunge mīrres? Erres ma nga ni pīlai nubo nga pulsövi Atua. <sup>14</sup> Kami san ni ko nga mimsi? Erres nga piveruse Elta se kalesia nir nga parini parlesi ni. Ko arongwose parlot suri ni ko parjivi oel van rengen re nise Numal se kerr. <sup>15</sup> Ko loten se nir nga nosurien ser mutoe ngok puloli morok pīrres luwi. Ko poro morok ololi pa nololien sopor, ko Numal se kerr pītlasi tweni ko suri, ko puloli niben pīterter luwi kele. <sup>16</sup> Suri nanu ngok, kami kapwerwerai tweni ko wor nololien se kami tevi kami, ko kaplot suri kami sisamis nga Atua puloli kaprres luwi. Loten se jinibb nga mumomsawos mīrres, derteren nen elep temijpal. <sup>17</sup> Elaeja evi jinibb nga mirpe kerr kobbong, ko olot eterter nga naus sete pus; ko renge sia itul ko devje sia kele san, naus sete ous renge dan. <sup>18</sup> Ko vitunen olot kele, ko naus ous vajin, ko orsel nir arres ko nanen elep kele vajin.

*Rrapteka jinibb nga mivel lingi weretunen pulwi kele*

<sup>19-20</sup> Tasik ko jojik, erres kaprongwose nanu ngel. Poro san re kami pivel lingi weretunen ngok, ko mīnij re kami ngok pian pītkai porluwi kele, ko mīnij nen ngok ololi pa majingen nga mīrres pēlak ko. Jinibb nga mokririeni jinibb sij mijkie renge sel nga sete mumomsawos, mulwi

vini renge sel nga mumomsawos kele, elai pa se mauren se jinibb nga m̄isij ngok, ko m̄er nga m̄isij ngok sete mia-jikki. Ko m̄erwomu ngok ololi kele sel nga Atua ñitlasi tweni nololien pilep.

**Naul On Nga Mimerr UriPiv  
The New Testament in the UriPiv language of  
Vanuatu**

copyright © 1996 Wycliffe Bible Translators

Language: UriPiv (UriPiv-Wala-Rano-Atchin)

Dialect: UriPiv

Translation by: WBT

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures. Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2022-03-11

---

PDF generated using Haiola and XeLaTeX on 11 Nov 2022 from source files dated 22 Nov 2019

96303ce7-aa0a-513c-862d-415957a542e1